

10. april 2014

UPA 2014/158
Ruth Heilmann

Inuusuttut inersimasullu innarluutillit atuartinneqarnissaannut, ilinniagaqalernissaannut suliffeqarnissaannullu kommunit inatsisit atuuttut naapertorlugit sunik pisussaaffeqarnerannik Naalackersuisut erseqqissaassuteqaqqullugit Inatsisartut aalajangiiffigisassaattut siunnersuut.

(Inatsisartunut ilaasortaq Agathe Fontain, Inuit Ataqtigiit)

Inatsisartuni ilaasortap Agathe Fontainip Inuit Ataqtigiit siunnersuummik saqqummius-sisoq qutsavigaarput.

Nunatsinni innarluuteqartut sullinneqarnerat pitsaanerpaaffimniittariaqartoq Siumumit isumaqarfigaarput, taamatut pitsaassuseqartumik innarluuteqartuutitsinnut nunatsinni sullissisoqaruni taava ullumikkut qallunaat nunaanniitavut utertissinnaagatsigit aammalu qallunaat nunaannut aallartitsisarunnaarnissarput angusinnaallutigu.

Ullumikkut qallunaat nunaannut aallartitsisarnerput akuersaaruminaatsuvoq aningaa-sarpassuarnimmi akeqaannarani aamma inuit pisinnaatitaaffiit Naalagaaffiit peqatigiit isumaqatigiissutaannut nunatsinnilu atuutilereersumut naapertuutingitsumik ilionerummat.

Inuusuttut inersimasullu innarluutillit atuartinneqarnissaannut ilinniagaqalernissaannut suliffeqarnissaannullu akisussaaffiup sumi inissisimaneranik siunnersuuteqartoq ugartui-voq. Innarluutilinnut sullissinermut akisussaaffik januarip aallaqqaataani 2011-mi kommu-ninut nuunneqarpoq, maannalu ukiut pingajussaa ingerlavoq akisussaaffiup kommuninut isumaqatiginniutigineqareerluni nuunneqarneranut.

Naalackersuisut akissuteqarneranni erseqqissaatigineqarpoq maanna KANUKOKA sule-qatigalugu nalilersuineq ingerlanneqaleruttorluni aallartinneqareersimasoq, Siumumit paaserusoqaarput naliliinerup inernera qaqugu saqqummiunneqassanersoq, taannaa-sussaammammi ullumimut innarluutillit kommunimit akisussaaffigineqalernerannik sullin-neqarnerannillu takussutissaassasoq annertoq, tamanna Siumumit qilanaareqaarput saqqummiunneqareerneranilu nalilersueqataanissamat piareersimavugut.

Taamatut Naalackersuisut akissuteqarneranni apererusunnarsipput akissuteqarnissamat naliliineq utaqqineqassanersoq, imaluunniit ullumikkut inatsisit atuuttut aallaavigalugit akissuteqarnerisut?

Ippassaq immikkoortoq 111-mut tunngatillugu innarluutilinnut sullissisunut piginnaanngorsaanissanik pikkorissaanissanik ilinniartitaanissaannillu annertuumik oqallisigininnermi aamma tikinneqartunut ilaavoq innarluutilinnut angajoqqaajusut ilaqutaasut tapersersotillu pikkorissaanermik ingerlatsivigineqarnissaat qanoq pingaaruteqassusia tamanna Siumumit assut pisariaqartutut aamma isumaqarfigaarput iliuuseqarfigineqarnissaalu piumasarivarput.

Siunnersuuteqartup innarluutillit atuartitaanissaannik ingerlatsinissamut ullumikkut inatsisit atuuttut qanoq paasineqarnissaanik ujartuivoq, tamannalu Naalakkersuisut nassuiaateqarfigisariaqarpaat akissuteqarfigalugillu.

Akissuteqarnermi paasissutissat taamaattut ataatsimiititaliamit soqutiginaateqartussaamata kissaatigaarput siunnersuut ataatsimiititaliamut ingerlatinneqaruni aamma pissusissamisoortoq.